

## **Atodiad 6 – Cynnig i'r Bwrdd Iechyd**

### **PWYLLGOR AMDDIFFYN YSBYTY COFFA FFESTINIOG FFESTINIOG MEMORIAL HOSPITAL DEFENCE COMMITTEE**

**4ydd Ionawr 2008**

#### *I sylw aelodau a swyddogion y Bwrdd Iechyd*

Wele restr isod o rai o'r penderfyniadau a gymerwyd gan y Bwrdd yn ystod y tair blynedd diwethaf parthed gofal iechyd yn ardal Blaenau Ffestiniog:-

- Defnyddio salwch ffisiotherapydd fel esgus i gau'r clinig ffisiotherapi yn barhaol, a hynny er gwaethaf protest leol gref.
- Mae eich dadl dros gau yr Ysbyty Coffa yn un wan (Caed sicrwydd o sawl cyfeiriad yn y gorffennol, gan gynnwys un y Gweinidog Iechyd Brian Gibbons ei hun yn ystod etholiadau 2007, mai unig fwriad i ysbyty newydd Alltwn oedd i ddisodli Ysbyty Bron-y-garth a Chlinig Porthmadog.)
- Rydych wedi anwybyddu pob pryder, gwrthwynebiad a dadl a gyflwynwyd ichi (oddi wrth y meddygon lleol, staff yr Ysbyty, CIC Meirionnydd, Aelodau Seneddol a rhai'r Cynulliad, y Pwyllgor Amddiffyn a hyd yn oed bryderon un o aelodau'r Bwrdd ei hun, heb sôn am y gwrthwynebiad a welwyd mewn cyfarfodydd cyhoeddus, mewn gweithdai, deisebau a ralïau).
- Roedd eich dogfen 'Dweud Eich Dweud' yn dadlau mai '*diffyg preifatrwydd i'r claf*' oedd un o'r prif ddadleuon dros gau'r Ysbyty Coffa, a hynny pan oedd wardiau'r dynion a'r merched wedi eu lleoli yn nau ben yr adeilad, efo hanner canllath o goridor yn eu gwahanu. Ond eto i gyd, eich ateb chi i'r '*broblem*' honedig oedd symud cleifion y dynion i ystafell gul drws nesaf i Ward y Merched, oedd yn golygu bod merched a dynion yn awr yn gorfod rhannu nid yn unig yr Ystafell Ddydd ond hefyd yr un ward yn aml iawn! Mewn geiriau eraill, fe aethoch allan o'ch ffordd i **greu wardiau cymysg** a thrwy hynny y '*diffyg preifatrwydd*' nad oedd yn bod cyn hynny. Gellir gweld hyn naill ai fel blerwch amaturaidd ar eich rhan neu fel ymgais gwbl sinigaidd i gryfhau eich dadl dros gau yr Ysbyty. Efallai y byddwch cystal ag egluro pa un?

- Roeddem yn arbennig o flin bod eich swyddogion gweithredol – pob un ohonynt ar gyflogau hael iawn – wedi cymryd yn ganiataol o’r cychwyn bod ganddynt yr awdurdod i anwybyddu barn y cyhoedd ac i weithredu’n unbenaethol.
- Mae tynnu 5 o wlaŵ o Ysbyty Coffa Ffestiniog wedi creu rhagor o broblemau yn ysbytai Gwynedd a Llandudno. Fe allodd Mr Michael Williams, Adolygydd Swyddogol y Gweinidog Iechyd, gadarnhau hynny drosto’i hun pan ymwelodd yn ddirybudd â’r Ysbyty rhyw chwe wythnos yn ôl. Roedd y 12 gwely yn yr Ysbyty Coffa yn llawn, fel sy’n arferol, ac roedd cymaint â 4 claf yn YG yn dal i aros am gael eu trosglwyddo yno. Ac nid eithriad yw sefyllfa o’r fath, fel y gall ystadegau YG ei brofi’n hawdd oherwydd mae’r broblem yn parhau hyd heddiw.

Os y byddwch yn glynu at eich bwriad i symud pob gwely o’r Ysbyty Coffa, yna mae’n gwbl amlwg mai gwaethygu wnaiff y sefyllfa ac na fydd Ysbyty Alltwen, unwaith y caiff honno ei hagar, yn gallu delio efo’r galw.

## **Y Ffordd Ymlaen yn Ein Barn Ni**

- *Ni allwn mwyach gau llygad i'r diffyg preifatrwydd sy'n bodoli erbyn hyn yn Ysbyty Coffa Ffestiniog*
- *Ac ni allwch chi, Aelodau'r Bwrdd, wadu eich rhan chi yn mynd ati'n fwriadol i greu'r sefyllfa honno.*
- *Yn ein barn ni, gellir datrys y broblem mewn un o ddwy ffordd :-*  
*NAILL AI (i) Bydd raid symud Ward y Dynion yn ôl i ble'r oedd hi a chodi estyniad ar y safle i ad-leoli'r Uned Ffisiotherapi.*  
*NEU (ii) Defnyddio'r estyniad i greu Ward 4-gwely newydd ar gyfer y dynion.*  
*(Ym marn yr arbenigwyr, mae'r naill ddewis neu'r llall yn gwbl ymarferol)*

Rydym yn amgáu cynlluniau pensaernïol ar gyfer ward 4-gwely sy'n cynnwys darpariaeth 'en-suite'. (Hawdd fydd addasu'r cynllun yn ôl y gofyn.)

Byddai adeiladu'r estyniad yn golygu'r newidiadau hyn i'r adeilad presennol –

- (a) Ymestyn y prif goridor.
- (b) Creu drws cyswllt rhwng yr Ysbyty a'r adeilad newydd.
- (c) Creu cyntedd a phrif fynedfa newydd (Atodir sgets artist i roi syniad o fel y byddai'r cyfan yn edrych.

## **AMCANGOST**

Mae'r cynllun enghreifftiol yn dangos ward 4-gwely o faint 70 metr sgwâr. Gan weithio ar gost hael o £2,500 y fetr sgwâr (£2,326 y fetr sgwâr a awgrymir yn y cyfarwyddyd swyddogol '*Departmental Cost Allowance Guide*'), yna cost lawn adeiladu ward newydd fyddai **£175,000**. Ychwaneged **£120,000** ar gyfer y gwaith addasu i gysylltu'r estyniad newydd efo'r Ysbyty ei hun (y swm yma eto'n un hael), yna byddai cost lawn y cynllun yn dipyn is na **£300,000**.

## **EIN HADDEWID**

**Ar y cyd efo Cyfeillion yr Ysbyty Coffa, rydym yn gwneud addewid y byddwn yn cyfrannu hanner yr amcangost uchod - **£150,000** – tuag at y datblygiad.**

Ein gobaith yw y byddwch yn rhoi ystyriaeth ddifrifol i'r cynnig hwn yng ngyfarfod nesaf y Bwrdd.

**DIM ATEB!**

